

Lô Testamin dè Tanta Vitorine

Parsonâdzô : Seyin
Sara
Josètè
Lina
Noisètè
Frisètè

Josètè : Noe sin a min proeu visto. Chè kô gnon.

Lina : Lè drâlô tye l'onsè Seyin lè kô pa intye. Dè kotema lè tîti lô premiè parto.

Sara : Mè simblè tye, di tye tanta Vitorinè dè môrta, l'a bien bâcha. Lè pâmi se émôdo.

Josètè : Tanta Vitorinè dè môrta soebetamin. L'onse lè ju chôko.

Lina : Tanta Vitorinè, l'ère la première dè la fameye, è l'onsè Seyin lô darai, è enkô tô dzoevenô kan l'an perdu la mama. Pô yui, tanta l'ère sa mirè. Dayoeu fazai rin sin demandé avi a tanta.

Sara : E nontri dâvouè chouairè; li gran damè dè Dzènèva, sébin se de vindran pâ prindrè kôgnesanse du testamin?

Josètè : Voua, voua, de vegnon pâ. De son dza pâ vègnoe a l'intèrèmin dè tanta Vitorinè.

Lina : Na, a l'intèrèmin d'éron pâ intye, mi vouai pô lô testamin gadzô ma tita a kôpé, tye d'aruvon. Pô li sou de son intye. De nô z'impatzon pâ pôr sin.

Seyin : (intrè) Bondzô mi kroyè. (Li z'imbrasè li zoenè apri li zâtrè.)

Li trai : Bondzô l'onsè!

Seyin : Marci mi brâvè petioudè. Se voue si pâ intye utôr dè mè, yaré pâmi lô goue dè vivrè.

Noisètè à Frisete; (intron)

Noisètè : (soeutè u kou a l'onsè) Bondzô l'onsè, tyin plasi de vô vè.

Frisètè : (de fi parai) Bondzô l'onsè vouitè tôte lô mimô.

Seyin : Bondzô. Vô deyô frantzemin, se vô z'ésô rinkontro din la ruva, vô z'aré pâ røkôgnu.

Frisètè : Voue nô z'éstyuzérai. N'arin tan anmo vèni a l'intèrèmin dè tanta Vitorinè. Mi si dzô lé, n'avin joestamin li karan-t'an dè l'oevertœra dè nontra maizon a Dzenèva. N'in proeu tan sondja a vô mi n'in pâ chu min firè.

Noisètè : Voué n'avin proeu pâ l'espri a la fita si dzô lé. Noe vô z'in pâ ublo, n'in prèya trai tzapèlè.

Seyin : Voue l'ô m'ari pâ de, tye lô krizé kanmimô. Mi lè te pouesiblô tye yè dza karan-t'an tye voué uvè hla bouaite dè ni a Dzenèva ?

Noisètè : Lè pâ n'a bouaite dè ni. Lè n'a maizon d'atrachon è dè distrachon.

Frisètè : Lè proeu n'a bouaite dè ni son voeu... Mi lè pâ n'a bouaite dè ni min li z'âtrè... In tche nô, lè n'a bouaite dè ni katôleka.

Seyin : Na bouaite dè ni katoleka ? (ri) Fau proeu tô avouire din si pourô mondô... Si dzô lé, lô tzapèlè voue l'arai proeu prèya a rêvartzon. Sôce fedrai proeu l'ékrirè din lô laivrô di rekôr. Lè pô chuire l'uneka bouaite katôleka du mondô.

Tzâtèlan : (intrè) Bondzô a tô lô mondô.

Tyoe : (Sè laivon tyoe) Bondzô Mouesioe lo tzâtèlan

Tzâtèlan : Chèta vô. Lè tôte mieou d'itrè chèto por atyoeuté lô kontènu d'on testamin. On reskè min dè sè firè dè mau.

L'an du Seignœu, lô dou janviè 1980 a Lede.

Vitorinè Frepa, nativa du dou janviè 1922, bouba dè Sidoni e dè Jarmin Frepa a Lede è son frèrè Seyin Frepa natif du dou janviè 1932, boubo dè Sidoni è Jarmin Frepa a Lede.

Tyoe dou san d'espri. Convegnon insimblô è in plin n'akô, dè sè bayè l'on l'âtrô u darai survivein, tô sô tye l'an in lou posèchon. Noe deyin : bâtemin, campagne, mayin, vegnè è mazô a Bôvargne; ardzin se yin na, tye sai in dètô u in n'épârgne.

Segna lô dou janviè 1980.

Vitorinè Frepa
Seyin Frepa

Tzâtèlan : E vô kâtiè badiè a demandé ?

Noisètè : Voue avi pâ manka dè nô firè vèni di Dzènèva, pô nô yerè tye n'in rin a éreté !

Tzâtèlan : N'in respètô la louè. Noe vô z'in avija du dzô dè l'oevertœra du testamin. N'in fi nontrô dèvouè. E vô vouéri libré dè vèni, mi voue avi pâ d'ublegachon.

Noisètè : Paye nô amin li frai dè déplasèmin è la dzôrniva tye n'in pardu !

Tzâtèlan : Lè pâ écri din lô testamin. Gnon vô dai rin. Yè te d'atrè kestion ? Se lè pâ lô kâ, yé pâmi rin a firè. Vô deyo arèvouè a tyoe. (sortè)

Frisètè : Noisètè, tè fau tè kalmé toe vâ tra yoin.

Noisètè : Toe vâ tra yoin, toe vâ tra yoin ! Vé pâ tra yoin, toe sa vouiro noe perzin vouai ?

Frisètè : Noisètè atyœuta : Tanta Vitorina è l'onsè Seyin l'an tôte lou via turbino è krapenô insimblô. Lè min dè joesto tye l'onsè l'ésè éreto. Yô min kôgnô l'onsè Seyin, sai chuire, tye vouai se fau, lè prè a firè on testamin in nontra faou. In n'apri dè yui.

Seyin : Sin lè sô tye yé tôte sondja. Di lô dzô tye n'in fi lô testamin avoui la chouaira. Mè sai de se lè yô tye survivô, apri l'intèrèmin dè ma chouaira, fizo lo testamin in faou dè mi gnesè.

Frisètè : Voue vaidè sikou ? Yérô chuire tye l'onsè lachevè pâ tzè si gnesè.

Seyin : Atinchon, atinchon ! Fau pâ vindrè la pi dè l'ourse tra vistô... Tô d'on kou mè venu l'idé dè mè marié. Yô yanmô tan li maino.

Lina : Vô fau rèflèchi, l'onsè... Vô marié lè vouena. Mi avai dè maino, lè on n'âtra !

Sara : Pôr avai dè maino, fau marié n'a dzœevena, sèpâ se voué sondja a sin ?

Josètè : Mi li dzœevenè de vœra d'in voeulon pâmi tan dè maino.

Noisètè : Kan on sè pesè su li sokè, on poeu pâmi in n'avai dè maino.

Frisètè : Toe mi fi jéné min toe prèdzè. Mi lè vèré tye kan on n'a paso satant'an, li maino vegnon pâ a galô.

Seyin : Lâserai d'on bie li parôle grôcherè. Mi a stœu tye sâvon pâ prèdje atramin yi pardônô. In gènèral so tye voue vèni dè derè, lè tô véré. Mi din mon ka, lè pa parai ! Yô, sai jamin aito mario. Pouai sai fiè dè vô derè, yé jamin sokato pè li bouètè dè ni, mima min se de son katolekè. Sô tye fi tye a satant'an on n'è kô parai min a trintè sein. (Zim boum)

- Lina : Yè rin a derè, pô l'âge vouitè kô guiyerè. Mi pô trôvé n'a dzoevena, lè pâ tan aija.
- Josètè : Li dzoevenè dè vòra de son glôreyoeuzè, d'anmon mi dè Moesiôré tyè d'ômô dè la campagne.
- Sara : Li dzoevenè dè vòra lè min li pouezenè u poulaye. Kan lô vioeu pôlè s'aprôtzè, zioum è de pâson su li barière.
- Seyin : E vô sondja tye la fameye di Frepa d'alavè s'étyindrè ? Dè Frepè yin n'a kô proeu per intye. Mi dè Frepa sai sôlè. Lè pôr sin tye vouai mè marié. Mi mè fau pâmi atindrè, lè la daraire vouerba. Vouai pâ lache moueri si bio non dè Frepa ! Mi brâvè gnesè fidè vô pâ dè bila pô l'onsè Seyin... L'a trôvo n'a dzinta dzoevena. Din pou dè tin noe sarin mario.
- Frisètè : L'onsè yaré kô kâtye badiè a vô derè. A Dzènèva sai bien placha pô lô savai. Li dzoevenè tye de marion dè vioeu rabadan, lè pâ pôr sin tye de li z'anmon. De yi fan joli joestô lô tin tye fau pô li ploemé. Pouai apri hloeu pourô vioeu foernon a la tzardze dè la kouemouena, stoeu tye van pâ sè pindrè. Sin mè farai tra mau u tyoeu dè vô vè fouerni dinsè.
- Seyin : Yô yè karant'an tye yé mau u tyoeu. Yé pâ manka dè vo derè pôrtyè... Voue lô sâdè !
- Noisètè : (grindze dézôn lô nâ a Seyin) Noe partin vòra. Mi ti dâvouè gnesè dè Dzènèva, Frisètè è Noisètè, toe li vari pâ a ton intèrèmin !
- Seyin : Sin mè fi plaizi dè t'avouire derè enfin on mô dè vèreto. N'a bona vèreto de Lapalise.
- (Li dâvouè de parton ayeni sin derè arèvouè)
(Li trai z'âtrè gnesè de sè laivon. Seyin fi segnô d'atindrè)
- Seyin : Mi brâvè gnesè, voue tindrai pâ kontô dè sô tye vô zé de. Yé fi la konta du mareyâdzô ésprè pô mé débarache dè hlè dâvouè sokè de la bouaite katoleka. Dioe sai bényi, de son via. Atyoeutâ mè bien mi brâvè gnesè: Apri l'intètèmin dè tanta Vitorina, yé fi lô testamen in faou dè vô trai. Voue lô mèreta. Lô testamin lè in tche lô dzoedzô. E vòlâ on dôblô pôr vô. (Yi badè n'invelôpa).
- Li trai : Marci bien l'onsè (dè l'imbrason)